

四庫全書

集部

欽定四庫全書

集部

則堂集卷一

詳校官庶吉士<sub>臣</sub>李如筠

主事<sub>臣</sub>呂雲棟覆勘

謄錄監生<sub>臣</sub>溫廷鑑

欽定四庫全書

集部四

提要

則堂集六卷

別集類三 宋

臣等謹案則堂集六卷宋家鉉翁撰翁喜談

春秋尤喜談易其河間假館詩曰擬從諸君

豫乞石一方他年埋之冢前三四尺上書宋

使姓某其名某下書人是西州之西老縫掖平

生著書苦不多可傳者見之春秋與周易然

春秋詳說至今尚有刊本已別著錄其說易之書與其文集二十卷則已全佚惟永樂大典收其詩文尚夥謹裒合排比以類相從釐為文一卷詩詞一卷核其所作大半皆在河間而明神宗時樊深撰河間府志已不能採錄則其佚在萬歷前矣鉉翁隸籍眉山與蘇軾為里人故集中如文品堂記養志堂記志堂說篤信齋說跋太白賞月圖和歸去來辭

諸篇及豌豆菜詩自註間或稱述軾事迹廣  
漢張栻亦其鄉人故敬室記首亦慨然於南  
軒之學漸昧其傳然其學問淵源則實出金  
谿觀集中心齋說主靜箴諸篇可以槩見故  
其持論浸淫於佛氏其說易亦惟以先天太  
極研思於虛杳之中而尊教堂記一篇至援  
陸九淵之言以三教歸一立說尤為乖舛顧  
其立言大旨皆歸於敦厚風俗崇獎名教隨

事推闡無非以禮義為訓原未嘗滉漾恣肆  
如明代姚江之末流其詞意真樸文不掩質  
亦異乎南宋末年纖詭繁碎之格尚為多有  
可取耳且迹厥生平上雖不及文天祥而下  
比留夢炎輩則皦然其不侔零篇斷簡以其  
人重之亦可也乾隆四十六年九月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

則堂集卷一

宋 家鉉翁 撰

制

浙西判官高越可水部郎中制

勅多士之世副臺郎之選者前代謂之賢乃知三署之  
屬例無輕授某官高越早踐朝序嘗為史臣當官有聲  
聚學不倦頃屬上將出臨大藩輟叅入幕之資備觀理  
劇之用府罷赴闕時名益高司川之秩俾從真授無忘

職業以荷朝恩

記

中齋記

學問之道貴乎擇中而已矣孔門四科七十子皆升堂入室之士夫子獨許顏子以擇乎中庸是知中之未易擇也嗚呼中之未發本一理也及其發而達之于用則一理散見於萬殊萬殊之中莫不各具一理隨時而見也隨事而在也隨地而各不同也在斯時則斯為中至



他時則斯不為中矣在斯事則斯為中至他事則斯不為中矣在斯地則斯為中去斯地而之他所則斯不為中而為偏矣苟非擇之精辨之審豈能隨時而應之隨事而節之隨所遇而折衷之動與中會而無毫釐之爽乎是故學問之道擇中為難聖賢教人使之博學審問慎思明辨以窮盡天下事物之理理窮知致則事物過乎吾前如短長之就尺度輕重之適權衡皆有自然之則萬雖殊而無非中之所在也此所謂理一而用殊用

雖殊而理未嘗不一是之謂中學沁水高濟卿篤學而好修端勁而溫裕佐幕憲府政譽藹然榜其齋曰中俾余為之記之余語之曰律令之中余不能知也義理之中余嘗學焉中有定體而無定用其用之無定者固其體之所存然不可執定體而求之也子講磨有素每持經訓以為臨事之準的車轍所行裁處無滯見識明允余復何以為告然嘗觀孟子論楊墨之為我兼愛而曰子莫執中為近之執中無權猶執一也夫子莫之執中

蓋知審擇乎過與不及之間者也而孟子于其間又發出中與權之義而曰執中無權猶執一也奧哉權乎舜執兩端而用中權也中庸之時中亦權也執一而無權為其滯乎一而不能周乎萬也濟卿所居之官審刑之官也人有麗乎重者子欲輕之輕之誠是然必酌其情之輕重而權以處之則中在是矣人有麗乎輕者或欲重之重之固非然必察其為誤為故而權以處之則中在是矣夫權非中外之物也乃中之權也擇之精辨之

審而後知權之所在推之他事達之他官取之左右逢其原可也此余所謂義理之中輒書以為贈

雲齋記

士有抱負奇偉不求為世用猶典教一方以其道私淑諸人者是雖仕也而實隱也是雖隱也與潛深伏與獨善其身者異矣河間張彥舉早負鄉曲盛名以鄉國公選教授六州十年于茲安恬不競余所謂仕而隱隱而能以其道私淑諸人者也彥舉以雲名齋俾余為之記

余諗之曰雲一也瑞乎天者為慶雲澤乎物者為油雲  
栖遲巖竇偃薄林壑不能為瑞為澤者則閑雲也予取  
其為瑞者乎抑取其為澤者乎抑慕其栖巖偃壑適已  
之適而忘情于斯世乎昔者禹臯稷契並處堯朝蔚乎  
其輝炳乎其容衣被下士人莫名其功此雲之瑞乎天  
者也伊起于莘說奮于巖其君用之其類應之膚寸而  
升不終朝而雨乎八紘此雲之澤乎物者也乃若荷篠  
耦耕之倫以放曠為高處不違其里行不越其鄉羞幣

聘而傲王公則岫雲之無心者也吾子學孔孟之學誦詩讀書考古訂今方將有用於世彼隱君子遯世之事不足為子言也然則雲以名齋義何居乎張子曰嘻吾敢志古人之志乎蓋雲者雨之根也學問者事業所從來也高山大澤其包納也厚其涵蓄也久故氣之升乎天者氤氲郁紛澤乎土者霖霖霑濡是豈一日之積乎士君子之學亦猶是耳吾典教六州士之從吾遊者數十百人其渴于聞道若旱苗之望滋吾懼乎無以雨之

窮年兀兀唯日孜孜亦欲厚吾之所蓄庶有以霑溉吾  
徒云爾子不觀諸易乎雲雷而為屯雷雨而為解屯之  
雲雷其蓄諸中者乎解之雷雨其澤諸外者乎子知屯  
之必能為解知雲之必能為雨則知吾命齋之意矣乃  
若臯稷伊傅之事業關乎天而制于命吾如彼何哉子  
其毋以為問余聞君言為之歌曰山之高兮雲之涵兮  
澤之大兮雲所納兮子之居畝宮環堵兮道所存兮充  
子之學道彌大施彌溥兮雲兮雲兮其孰窺子之際兮

遂書以為記

雪庵記

余蜀人也蜀之西有雪山焉崔嵬萬尋皓爽高潔貫冬夏而不改余愛之仰之暇日必升高丘以望當其喜而泰舒山與余心俱明當其靜而斂藏山與余心俱肅或憂愁縈紆覩山而萬慮俱澄或事物膠轕見山而萬紛俱寂余每慨然嘆曰山乎雪乎其余之良朋畏友乎何其典刑法度參前倚衡動與余會乎山中有隱君子年



八九十一日造余言曰子之愛雪乃至是乎雖然子見之以目而未能喻之於心也見其粗而未見其精也雪中有易子知之乎余曰未也隱者曰子歸而求之於易余自是讀易數十遍粗見大意猶未有以貫而通之也中年讀禮至經解篇子曰潔靜精微易之教也乃廢卷而作曰雪中之易其在是乎夫無極而太極易之所從來也方其沖漠無朕不可以象形窺不可以聲臭測一而不二純而不雜謂之潔靜豈不然乎迨夫兩儀既分

四象既立乾坤索而成六子三畫動而為六畫方以類聚而天地水火風雷山澤各居其方物以羣分而八重卦互相為索而成六十有四衍而至於千萬推而極於毫髮天下之至微而至精孰有加於此者乎譬之雪焉遠而眺之高下散殊一目千里即而玩之飛者為六出墮者為粒繁而不紊密而不汨其寓物而成形也方中乎矩圓中乎規小成其小大成其大千態萬狀自然天成其精也不離乎潔其潔也所以為精雪乎易乎是可

得而淺窺之乎余始居西壘之下自以為有得於雪及  
聞隱者之言返而求之於易然後知潔靜之中有精微  
之蘊不在乎境而在乎吾之此心也嗟夫心內也境外  
也心境混融而後有一見道之全體得之於目而不能  
喻之於心未免見其粗而遺其精也彼隱君子其知道  
者乎漳川郭長卿令名實踐士論共推分教高陽余始  
得定交聆其話言挹其容色窺覘其文字之溫雅知其  
涵養充積厥有自來長卿以雪名庵俾余為之記余惟

學者之於雪與騷翁詞人異騷翁詞人玩物而逐於物  
烏能知雪學者以心悟雪以雪洗心內外契合以成其  
為德非徒一篇一詠留連光景而自以為有得於雪也  
長卿粹於學易而以雪命庵契雪於心者也意其宮庭  
屋漏造次顛沛無斯須不在乎是其有得於雪者乎故  
余以昔之得於易者而從君質焉願長卿有以告之匪  
敢言記

見山亭記

余周遊半天下見山多矣晚歲羈寓古瀛乃在燕齊趙  
之間其地平曠衍沃環數百里無高山大阜可登覽以  
自壯里人病之繪山於屏疊山於庭以寄其願見山而  
不可得之情余過而見之語之曰子誠好山然好其似  
而未知其真也夫真知山者不求山於山也繪者之於  
繪疊者之於疊皆以象而求山象之外有真意焉彼豈  
能知之乎知山之真者其惟吾徒乎王君虞卿鄉之老  
學宿儒授徒三十年坐下冠者童子常以百數平居以

主敬自持訓飭學徒惟在一敬喜愠不外形動作有常則鄉黨歸重人無異詞余亦幸託友焉一日聞君作亭向西榜曰見山亟往訪而觀之坐定跂而望重城歸然其下屋瓦參差無所覩也余問虞卿子之山安在為我指示其處虞卿喆然大笑曰是中安得有山吾所見者非山之山也吾晨興坐於斯亭招諸生來前誦詩讀書講易說禮各業其業各吐所疑各炫所長有會於余心余為之喜如好山升乎楣樑修巘墮乎几格余每應接

不能暇也諸生退賓朋來集踵相接於斯亭談經者吾  
答以經論事者吾應以事自性命道德以至耕稼陶漁  
靡不畢陳會於余心余為之喜如巖崖豁開岡阜起伏  
各獻其狀為吾之有吾受之而不能既也至如元夫偉  
人長劍高冠下車而入振袂而升典型森羅法度具設  
則山之岱嵩廬衡一朝盡在目圍吾不出戶庭而覩天  
下之大觀是皆吾非山之山也彼騷翁詞人流連風景  
嘯傲林壑放意茂林脩竹之表適情雲山煙水之外一

觴一詠自以為知山皆逐物而遷者於山果何見乎余  
聞君言知君所見與世俗異為之擊節賞嘆然念君求  
山於人曷若求山於我乎求山於我求之吾此一心焉  
耳天高地下山峙川流日月照臨風霆鼓舞何莫非道  
體之流行何莫非心體之妙見學者以心會道境之過  
乎吾前皆心也心之會乎境者皆道也道非心外物境  
非道外物皆學道君子操存涵養中事耳昔夫子登東  
山而小魯登泰山而小天下道非在東山泰山也道在聖



人之身因東山泰山之高可以見道體之大吾今與君共登斯亭瀛之四境盡在目中又何以登他山為哉

秀野亭記

太行之陽多大山巨野士有志當世者仕而達則其設施見於時仕而不達則隱是山之中往往擇其地之勝處作屋而居之以為游息之所王君字某讀書積學宦游半世仕不至大官退于太行下築室置圃而居焉浩然自得不知老之將至也其子誠甫追述先志鋤治其

荒蕪興修其僵廢仍榜之曰秀野介友人求余為之作  
記庶幾先業不墜於地余嘉其志但未嘗身到其處不  
知野之所以得名客有游乎太行者為余具道其詳曰  
是野也四時不同而其景各異方春萬花俱紅萬草俱  
綠桃不言而成蹊杏不粉而成色千纔萬狀爭獻其芳  
春之秀也及夏華者漸實茁者漸茂茁茁盈乎沼吐蓂  
蔔噴乎巖崖槐障乎山萍拖乎水清風徐來萬暑皆却  
夏之秀也已而幽蘭在畹佳菊在徑則楚澤陶園之所

有此皆有之至於稻粱黍稷盈乎其野莫非秀也少焉  
雪積於岡冰起於崖松挺特而愈高栢槎枒而愈壯其  
下老梅百本修竹千竿如幽人節士相與為朋友其景  
其秀又與三時不同矣若夫有臺有亭有樹有居則又  
士君子樂其樂者秀其秀者也此則有不容盡言者當  
問乎其人乃能知之余曰子言善矣吾所謂秀則異乎  
是人生乎宇宙之內秉五行之秀而為五常之性孟子  
所謂惻隱羞惡辭讓是非者皆其秀之端也士所以為

士者此其秀也故三代之上其選用人才有俊士造士  
秀士其名不同士修之於野而秀其秀者達而秀於朝  
廷之上而野之為秀又不足言矣此蓋以在我本然之  
秀而為天下秀吾意王君之所以遺其子孫者乃是之  
秀也誠甫恪承先志謹守詩書之傳異時必以己之秀  
而為時之秀其設施又未可量也古語曰煌煌靈芝一  
年三秀誠甫其勉之

道山堂記

瀛之四郊皆平原廣野地勢趨於下惟城西一隅坡陀  
隱隆據風氣之要會友人趙器之別墅在焉西山橫陳  
於前崔嵬卓立如偉人元夫峨冠垂紳傲岸萬物之表  
其傍崗阜聯屬又如經生學士聚弁共談下視丘垤終  
不與為伍而山之面勢直乎吾墅情若相得者主人以  
暇日領客縱觀墅有堂有亭前此皆未為之扁客請以  
見山名堂以仰高名左亭覽雲名右亭庶補墅中之闕  
主人曰嘻名則善矣然近舍吾瀛遠取他山以為之名

可乎吾聞海上三神瀛洲居其一吾土之山亦以瀛名  
是可得而知其故歟洞山叟進曰通天地間一氣耳厥  
初判極輕清者歸於天重濁者附於地而重濁之中亦  
有輕清者焉則蓬萊方丈瀛洲之屬在人間世而出乎  
人間世者皆是也列子書謂方蓬嶠輿根無所著與潮  
波俱上下可以去東海而流西極佛徒亦謂西竺有山  
飛而附於南海之東至今猶存是其說雖若荒怪然竊  
意天地之始陰陽之初風氣凝而未固此容或有之至

人以道眼而觀知其為瀛命之曰瀛其散見於九州之壤不知幾蓬幾方幾瀛惟有道者識之他人有不能識也嗟夫山非高也水非深也而清氣所鍾歷萬古如一曰此吾瀛之所以為貴乎若人之慕三神者乘桴御風求之數萬里外而不可得則曰弱水阻乎其前也風引吾帆望三神而不可得至也孰知瀛在人境吾里於是吾居於是泮渙優游日與瀛俱豈非不出戶庭而都宇內之奇勝者乎客慕乎其外而為之名不知主人在此

而不在彼也於是扁堂曰道山名墅曰瀛圃堂乎圃乎  
非吾之固有而誰當有之乎或靳余曰主人方將有用  
於世子期之以遯世放曠之事不亦隘乎余曰非是之  
謂也山以道名著其高也圃以瀛名著其清也學道君  
子志乎高願卑者之同乎其高也居乎清願濁者之同  
乎其清也而豈遯世放曠之謂哉主人好樂詩書涵泳  
義理澹然泊然遠榮利而弗即知其志之所存居之所  
在是名也斯為稱乃書為記



道山書堂記

客或論余曰子昔歲壽主人賦西園嗣歲又賦瀛園皆  
馳騫神仙方外之說以興乎景所以為壽也今茲主人  
作室百堵將聚黨里後進而學焉子乃扁之曰道山書  
堂得非指海上三神而為之名乎三神者道家山也子  
以是名主人讀書處吾不知子之道為何道而山為何  
山也試為我言之僕曰唯唯子言是也夫道一而已矣  
由開闢而來至於今幾千萬年帝王聖賢所公共者此

道一也道之外豈復有他道乎迨至七雄之敝邪說並興加以嬴秦大道遂汨人有目老氏為道家者道而以家名蓋私之也而況海上之山有無荒忽誰能致詰方士謬言神仙居之因亦名之曰道家山山而以道家名蓋亦私之以為我有於道果何關乎余前賦西園賦瀛圃聊為寓言耳今扁是塾而曰道山書堂則吾道中之山也夫豈外求於無何有之鄉乎嗟夫莫大者道也莫高者山也大矣高矣而終不離乎平地此吾之所謂

道山也在易乾坤三交而為艮艮之象為山一陽居上  
高而有立性乾以為之性也二陰在下厚而可久性坤  
以為之性也高而有立厚而可久夫是以為止止其所  
止而不離乎平地斯止也蓋大學之止於至善良所以  
為山也自艮再變而為大畜山居上天在下聖人於其  
象而曰天在山中大畜此以著心體之大包納無間也  
夫天之高大而蘊乎山中以至微而蘊至大象人之此  
心虛靈瑩徹萬善畢備於天下義理無所不該然非學

問存養有以擴而充之則其大者不能為大故聖人於其象而曰天在山中大畜君子以多識前言往行以畜其德是蓋聖賢窮理之學也理窮性盡而天下萬物皆融會於此一心則良道所以成也彼為老氏之學者謂方蓬嶠輿根無所著與潮波上下可以去東海而流西極是其為山虛幻渺茫無所依據道其道山其山而非吾之所謂道山也器之主人高明而靜厚和裕而肅恪無慕乎其外晝而躬播西郊不憚勤苦夜而篝燈讀書

治已分事率至夜分乃寐嘗與余共讀程氏遺書至須  
彌無體芥子無量廢卷慨然曰彼既空之吾又從而無  
之其非聖人天在山中之旨乎吾以是知器之胷次所  
存過人遠甚故於茲塾之成發明此義因以為之名蓋  
佛氏之須彌老氏之三神同一幻妄質之聖人之易斷  
乎其不可同日語矣夫子嘗曰仁者樂山仁者靜仁者  
壽蓋仁則必靜靜則樂在山是以知其必壽器之仁者  
也靜者也眉壽千歲有不待祝處而為雍參出而為伊

傳皆仁者靜者之能事吾於器之有望遂書此為記

### 一樂堂記

人之生也負陰抱陽鍾五行之秀莫不各有自然之樂是其根諸性初與生俱生者也是樂也在中之樂發而為情情與樂俱遷則情蕩而樂肆欲勝而理亡矣故情在富貴則為富貴所遷以鳴玉曳履華轂朱輪而為樂情在功名則為功名所遷以抵掌鳴劍被堅擊強而為樂情在辯說則以鼓輔搖唇敷陳利害而為樂情在辭

章則以絺章繪句鋪張藻麗而為樂是其為樂逐情而遷非夫性分中之樂矣辟之水焉源乎崑崙出乎積石順而導之以趣於海汪洋混涵其來無窮是則水之性也猶人之樂自源徂流一本乎初純而無雜者也乃若潢汙之水激之過鰓綆之在山或決而東或決而西皆力所為非水之性也是烏足為樂昔者洙泗之上夫子亟言樂皆道內之樂也門人大弟子心領神會由是而有得於道者多矣至孟子論三樂以父母俱存兄弟無

故而為樂此是人倫天理相親相愛不假外求其樂在  
中而言也一而不二純而不雜夫是之謂一樂今太常  
中山田公正卿天下士也秉義立道正身齊家自處家  
庭行乎州里以至立乎朝廷之上動皆如則二親具慶  
年過七旬而力行不倦正卿與其二弟養志承顏溫清  
定省必躬必親余嘗聞前輩大老垂訓後學每以求顏  
子所樂者何事為問喫緊下功無過乎此今正卿以一  
樂名堂余請問之曰父母俱存兄弟無故其樂安在正



卿曰噫事其事則樂其樂矣厥父菑厥子播之父之菑  
匪懈益勤久而安焉則在中之樂也伯氏吹塤仲氏吹  
箎和兄之塤久而融焉則性分內之樂也嘗過庭服膺  
詩禮之訓退而與諸弟紬繹其旨未有能達者從而請  
焉父為師兄弟為友以是講學以是立身以是酬酢事  
物求有得焉是其樂之所在也余曰子之樂孝弟中之  
樂曾閔之樂也夫所謂樂求曾閔所樂何事而已請書  
以為記

傳清堂記

天秉陽位乎上而其清氣流行於宇宙間鍾而為賢人君子剛方直大不與世變相為推移者清氣之所鍾也斯人也出而見用於世發為議論著為事業屹底柱於中流會百川而注滄海世道每恃之以升降者一清之所為也然亦有出而見用於世乃與姦邪小人對峙而並立君子之勢常不勝乎小人則陰濁有以間吾之陽明而其清者不得直遂焉耳三代而下惟兩漢多君子

而東漢君子所立視西尤偉關西夫子楊公則善類之  
宗人物之領袖宇宙清氣之所鍾也自時厥後衆君子  
如杜喬李固陳蕃范滂繼踵而作皆能以世道自任公  
實為之倡公之風高矣然而仕不遇明時秉法立道於  
羣儉衆闇之間不克大展布以歿此有識之士所為慨  
嘆而公清節著於當時清名垂於後代如三辰五緯之  
麗天芒寒色正千載如一日是其清之終不可泯者也  
余周游海內每見公之裔孫宦游所至莫不恪守先訓

以四知名其居室晚歲在瀛乃與路知事楊君君寶適相邂逅問其家世則關西夫子之胄也其遠祖居於保州之梁門中原全盛時嘗為邊帥以威惠著聞其後徙居東城立四知祠於所居之奧將以勉勵子孫俾知家世之所從來也君寶之高祖擢進士第為萊陽令曾祖為萊陽丞廼祖繼登臚仕值時多難棄官膠水之北率子孫躬耕以自贍儉德避難者也君寶之先人復回萊城舊宅居止膠與萊聚指七百中更亂離轉徙不意獲

全君寶嫡長孫也自念祖先積德深厚故其傳世久而弗替求余為之名堂且為記以昭先烈余惟關西夫子位三公子孫蔬食徒步或勸之開產為後嗣計公曰使後世稱為清白吏子孫所以遺之者豈不厚乎至於今幾世幾傳而其裔孫猶知以一清自勵惟其有之是以似之豈不信哉謹名君之堂曰傳清而為之記余願君寶書太尉傳於四知祠之壁俾子孫朝夕見之仕者謹於官箴居者謹於家法老者以是勉其後生長者以是

率其童孺洞洞乎屬屬乎克謹而四知之畏充而至於中庸謹獨之地夫然後有光祖德而一清之氣脉流暢而無窮矣

### 品堂記

昔之評畫者以吳道子為神品上上王摩詰為妙品上上夫造於妙矣入於神矣其品復在上之上藝至是曠千載而獨立可也今二子之畫流落人間時或見之其精之至而造於妙者猶可求之筆畫之間其妙之至而

入於神者非筆畫形象之所可求蓋妙猶可識妙而入  
於神有未易識耳東坡翁在鳳翔有曰道子實雄放浩  
如海濤翻當其下手風雨快筆所未到意已吞又曰吳  
生雖妙絕猶以畫手論摩詰得之於象外有如仙翩謝  
籠樊其末又云吾觀二子皆奇俊又於維也歛衽無間  
言味詩意似以摩詰優於道子與畫品所評異矣然皆  
賞其妙而不及其所以神豈妙而入於神有未易言歟  
余周遊海內所識國工老手多矣精妙絕人往往多見

之有如神品上之上聞之矣而未之見也晚歲來瀛乃  
識相臺韓京叔鼎臣兄弟魏國忠獻公之諸孫也燕趙  
間推善繪必曰瀛海之二韓扣其門求其畫者踵相接  
也鄉黨前輩老成人每為余言韓氏兄弟畫入神品子  
無以尋常眼法而觀也嘗為大長老雪苑師作觀音地  
藏二相每焚香展玩光采鬱勃出乎頂間漸大滿一室  
中苑公寶而藏之不輕以示人比其歿畫為有力者取  
去余雖未及見之聞在他所而尤奇異鄉老成人所言



不誣也余嘗從容以問鼎臣乃曰人以吾畫為有神吾  
初不知其神如何也但昔嘗聞之師以為畫者心之精  
神得之心應之手不可以外求也故吾當畫時閉戶靜  
存畫是人則想其人之容色其動作語言想之有得然  
後像之以為像夫是以能得其真乃如繪天人相則想  
其清淨玄虛高出萬物之表繪浮屠氏在定相則想其  
湛寂內守神采蘊於不露繪浮屠氏應物相則想其莊  
嚴具足輝光發而外見皆積精以起之運智以成之畫

雖成於吾手吾不能神其所為其神者出於自然吾有不能知也余聞其言作而曰人以子之畫為神子不能知其神是子畫之所以幾於神也勉之哉摩詰道子不足多遜乃書品堂二字以遺之

近古堂記

余周遊半天下入其里觀其風俗淳厚人有士君子之行問之必古哲人上賢講學故處典型漸漬有自來矣歲戊寅自燕徙瀛三閱寒暑與其里人遊縱觀其俗尚

所異尊老貴德崇儉尚讓而好學其俗然也歲正月父  
老夙戒里中子弟少長咸集乃推其父祖行者俾坐中  
席相與羅拜於前既又推其兄行者俾坐右席復相與  
羅拜於左拜已奉觴為壽更勸酬莫不盡敬長者不嫌  
其為傲少者不以為卑屈有古者鄉飲之遺意焉父兄  
為集召賓友子弟姪甥列立執事奉豆觴進俎几行爵  
上饌奔走後先不參以僮隸有古者小學洒掃進退之  
遺節焉其為士者隆師而重道聞儒先生止於是必

就而訪之以道得其一言一行誦說記憶久弗忘也其  
為民者勤儉節用衣不紃綺食不重味有酒肉異饌必  
奉以進於老者退與一家蔬食以為常凡皆近古之彝  
則隨事而見者余心敬之未知其所以然也暇日考訂  
乃知漢大儒毛公嘗為河間獻王博士葬於郡西三十  
里高冢猶存而屬邑廣川董子之里十有餘年詩書氣  
脈郁乎未艾賢者道化感人之深有若此者余欲為之  
記之而未皇也僦去三徙自城之南歷西而東所至皆

有學塾授徒多者百餘人少者不下數十絃誦相聞藹然有古者鄉庠黨塾之遺意王君國寶所居近古堂則東塾也學校之廢六七十年而郡人猶能各以其力興城闕之久廢謂非善教之所覃可乎昔東坡公為眉山郡治記興作有及於鄉俗近古者三至今海內之人目眉山為三近古州今是邦禮讓之俗近古之風遽數之不能悉其可使之佚而無傳乎乃書此為之記自今由塾而庠由庠而泮頌復承平之舊將使海內之人目古

瀛為近古州顧不美與爾令長君子鉅宗達人其勉旃  
無墜兩先生詩書之澤

養志堂記

傳曰在心為志志者心之所之而未形於言者也孟子  
論曾子之孝而曰事親若曾子可謂養志者也夫當此  
心之動而有萌發而未形見於事是為志之始發而君  
子之事親乃能先意承志盡所以致養之道是豈有他  
哉亦積誠而已矣蓋曾子之孝根乎誠者也誠積於中

敬致乎養已之心即親之心已之志即親之志故能先  
意而乎隨事盡分而無一毫之慊是皆學問中事也是  
故中庸言反身而誠然後能盡順親之道大哉誠乎其  
曾子養志之所先乎真谷陳君覃懷人早歲避地來瀛  
因家焉窮經學古徧交當世偉人嘗佐一二大府幕治  
聲藹然浸階通顯而乃安恬不競歸卧里閭尋泉石之  
樂曾次抱負固有大過人者曾未得展其設施也冢嗣  
子新負經世之才修誠身之學溫恭有守端靜寡言其

學問淵源端可識也。比歲總府奉詔貢士子新蔚居選  
首士論歸重無異辭。調官中都迎致二親安輿就養。作  
堂三間。俾余為之名。余扁其堂曰養志。子新復求余為  
發其義。余以京都文物之數。辭不敢當。既又念來瀛一  
紀。定交君父子間。見其居家持身處鄉動由矩則。猶有  
中原盛時道學君子之典刑。故不克終辭。而書以復之。  
曰：養志之事。不特在晨昏定省。與夫起居食頃之間。必  
也以誠合誠。以志承志。乃為能盡其致養之道。吾子新



實允蹈之余嘗觀真谷好施子新輔其親以施優貧恤孤敬老字幼周人之急如已之急無所吝真谷好禮子新輔其親以禮吉凶慶弔之事講於鄉曲施於親舊巨細靡遺各中其度不見其有愔容矜色也真谷篤於交游之誼所居又臨燕齊大道士大夫過者無不來見子新竭力承接送往迎來惟親意之所欲為家非有餘力非充裕而天性嗜善激義與其親同之是皆人之所難而子新行之不以為難余是以知其誠存乎致養非特

余知之是邦前輩老成咸嘉嘆不已於言莫不曰子新事親庶幾乎養志者乎然余猶願有言焉昔者曾氏父子並登聖人之門三子言志而曾點獨舍瑟從容有志於暮春浴沂詠歸之樂夫子與之蓋三子志乎事功曾點獨志乎道此所以見取於聖門其後曾子造詣既深優入聖域遂膺聖道一貫之傳人以為自舍瑟中來曾點志乎道曾子亦志乎道此曾子養志之大者真谷家世覃懷地近洛中志濂伊之學有年于茲子新之學即

真谷之學子新之志即真谷之志願以聖道自期勉進乎中心如心之域是誠養志之大者子新其力行之

自貴堂記

自貴有二貴已之貴而無慕乎外學者事也貴已之貴而無志於世隱者事也無慕乎外可也無志於世則亦隱而已矣二五儲精人得其秀而最靈是以貴乎物然天能與人以此貴而不能使人皆知自貴知自貴者其必由學乎中庸之尊德性尊此者也孟子謂人人有貴

於已貴此者也此學者貴已之貴而加以學問存養之功所以全其天也人固貴乎物而士君子復有學以自貴其道夫然後在我者重而不為外誘所移窮而獨善其身此貴也達而得行其道亦此貴也處畎畝在朝廷素富貴素貧賤無入而不自得者知自貴者也若夫荷篠長沮接輿之倫傲世放曠自高其道彼自以為貴非聖門之所貴也長蘆高君正臣年盛氣老天資粹明學問不倦視榮進漠如也嘗采邵子歌詩以道自貴者而

扁其居室其立志可謂加於人一等矣然愚也竊願有  
諗焉蓋邵子之自貴即孟子之良貴而亞聖大賢出處  
殊致學者不得不辨也孟子以仁義忠信為天爵公卿  
大夫為人爵所以致嚴夫內外重輕之辨而孟子轍環  
天下應聘列國初未嘗以道自高遂忽然忘情於斯世  
也非仁義不談非堯舜不陳合則留否則去孟子所以  
自貴其道者蓋在此而邵子生當太平盛世君明臣良  
朝無闕政獨高尚其事者其志以為時可無仕焉耳孟

子志伊尹之志邵子樂顏子之樂一出一處惟義所在  
余所望於正臣亦欲其有用於世豈謂其遂可以隱乎  
蓋天者理也帝王盛時命曰天命祿曰天祿職曰天職  
臯夔稷契登庸在朝伊傅周召左右厥辟何莫非天之  
所命何莫非已之所貴初豈有所謂人爵者與天爵對  
峙而並行降而春秋戰國王制大壞聖賢無位以行其  
道而世祿之卿辨詭縱橫之士刑名律家刀筆賤微怙  
寵挾貴人慾以肆天理消亡孟子不得已而致辨乎此

曰如是而為天爵如是而為人爵又曰仁天之尊爵又  
曰仁則榮不仁則辱皆所以遏人慾之橫流扶天理於  
未墜復又為之言曰古之人修其天爵而人爵從之盖  
貴己之貴無慕乎外者士君子之常守而有此德必在  
此位者亦事理之當然時止而止時行而行本然之貴  
固自若也豈必高逝遠引而後能全其貴乎雖然自貴  
之自其義甚大聖賢每亟言焉夫子於乾而曰自強不  
息於晉而曰自昭明德書曰自作元命詩曰自求多福

金華先生集卷一  
皆使人反求諸已而自之於內不諉其自於人不寄其  
自於命夷險殊途而自之為自確乎其不可移也是又  
自貴之目正臣聞余言請書以為記遂為之書

### 隱求室記

余羈寓古瀛劉惠父書來陳誼甚偉其言曰西漢之季  
衆君子皆隱揚子雲獨仕東晉之季士大夫皆仕陶靖  
節獨隱吾不能効子雲頗慕為靖節榜讀書室曰隱求  
將以求吾志焉耳願為我發其義余得書瞿然曰惠父




立志如此加人一等矣然念聖賢出處隱見惟義所在  
隱之所志即達之所行志之所存乃道之所在故曰隱  
居以求其志行義以達其道伊之處莘呂之在渭隱也  
而志在天下荷篠耦耕楚狂接輿亦隱也而志止於其  
身是雖所志不同亦由其分量有淺深故其推致有廣  
狹譬諸萬斛之舟艤乎荒陂膠乎野澤而三江五湖皆  
其力量之所及有不行行斯達矣乃若剡木為舢剡桐  
為楫可以泛滄浪涉溱洧而不能乘長風破萬里浪其

所負挾者淺也然則士君子所志何志志乎道也志乎道者志乎學者也由致知格物正心修身推而致之以至齊家治國志此者也學此者也積功於幾微毫忽之間存誠於戒謹恐懼之際必使在我者根基固實標本正大然後涉世故而不為事物所亂可隱可見惟義所安故君子非隱之為難隱而能求其志之為難也惠父溫裕而雅正侍梅溪翁日以講學為事介然有立恬然不競余敬愛之每期之以遠故樂以聖賢學問行事

為惠父告或曰如子所言將使惠父隱以求志耶抑使  
惠父仕以行其志耶曰亦欲惠甫志其所志而已矣遯  
九五嘉遯貞吉象曰嘉遯之吉以正志也遯之正志與  
論語隱居求志其立義固各有所在然居遯而能正其  
志者必隱居而能求其志者也遯之為卦二陰浸長得  
位而居內四陽遯乎外君子退而窮處之象也而九五  
一爻居中履正為衆陽所宗陰雖盛而不能干其志正  
也外物之誘不能入則學力充而操守固何行而非道

遜之至善者也閔子漆雕有焉併以是復之惠父



欽定四庫全書

集部

則堂集卷二

詳校官庶吉士<sub>臣</sub>李如筠

主事<sub>臣</sub>呂雲棟覆勘

謄錄監生<sub>臣</sub>溫廷鑑

欽定四庫全書

則堂集卷二

宋 家鉉翁 撰

記

肅堂記

余始至瀛僦居中城隣於種德李氏獲與志遠及其弟  
茂實為文字友余敬之愛之恨相得之晚里人或語余  
曰子未識其父兄耳識其父兄則知淵源所漸厥有自  
來也久而種德翁簿正高陽滿考來歸舜臣亦自肅寧

至余乃得升老子之堂徧交羣從典刑法度炳乎相輝  
或以文采著或以政事稱皆端靜而內守篤學而好修  
信鄉譽之不虛得也肅寧壯邑也介燕趙之間民物繁  
阜風氣雜揉自昔以為難治或勸無往君慨然曰邑以  
肅名吾平日僦用一肅字當以吾之肅肅彼之未肅奚  
難治之有乃隨事而整葺之邑庠久廢矜佩散而之四  
方文風索然君首以興學為務聿新泮宇漸復舊章絃  
誦之音洋洋盈耳人知講學之為貴是其政之肅而文

也五方游惰之人怙威羣行積為田里之害君震之以  
不怒馴之以有禮強梗率服入其境相戒無犯是其政  
之肅而和也健險好勝之氓持吏短長以為訟端敗俗  
傷化莫此最甚君臨之以莊鎮之以靜伸其鬱滯而平  
其險囂莫不革心向善俯首從化舊習為之丕變是政  
之肅而有紀也在官六七年乃獲授代以去邦人為之  
立碑頌德以為前之宰是邑者幾人久而肅肅而成如  
君全美實所鮮儷余昔扁君之堂曰肅以昭其實也君



欲記之以發揚其義乃重告之曰夫肅之為肅乃聖賢學問中之事非世俗尚威嚴以為肅也肅之此心肅之此身心正而身修肅之本也其本既正然後推以達之於事本正而末舉聖賢學問之肅也三代而下為政者尚防禁設章程以求人之肅此吏治之肅非學問中事君子有不貴也易之文言曰直其正也方其義也又曰君子敬以直內義以方外敬義立而德不孤文言之敬直即學問之道所以肅乎其內者也文言之外方即吾

內肅所以達之於事而無不肅者也。大率主敬以為之。肅則心正身修而內自肅也。未有中無所主而能內肅者也。未有內之既直而外之不能方者也。文言之直方。貫本末該內外而為言也。余觀舜臣父子兄弟所以修之家庭者。而知其平日用工在內。所主在敬也。惟其所主在敬。故其達之於外者。無往而不肅。君今贊貳淮安。以其施之一邑者而施之一州。廉譽著聞。士論歸重。無異辭此敬直之效驗。隨地而著者也。由是而擴充在我。

之工夫無有間斷則其肅之於外者將日異而月不同  
豈止一邑一州而已哉舜臣其勉之

敬室記

朱張二先生倡道東南共扶千載之墜緒志同而道合  
相得而彌章者也而武夷之傳至于今百有餘年門人  
高弟皆能尊聞行知以其得於師者復畀於後今再三  
傳莫不曰我朱門之的派噫其盛矣余獨恨南軒先生  
無恙時士之登門受業者袂聯踵接而吾蜀人互鄉闕

黨之執經隅坐視他邦為尤衆中更蜀亂衣冠散落南  
土或以文學顯或以科舉政事奮莫有汴其學問源脈  
之所從來而以廣漢之道自鳴于當世者雖時使之然  
而從遊之士亦不為無責也宇文氏再世從先生嘗在  
大弟子之列淳祐間子敬始自蜀來輯其先世所聞於  
先生者求訂證於庸齋趙公之門庸齋深器許之為之  
大書以表其傳且曰南軒之道在子其勉之哉自是以  
來子敬欽承一綫之緒為學愈篤用志愈專而縉紳士

大夫所以期之者亦莫不在是會余以國事久羈於北  
子敬書來孳孳問辨不以患難零落而廢其講習之功  
且屬余為書敬室二字曰此南軒先生所以遺吾祖者  
中燬於火願為我更書之余辭不敢僭然宇文氏之得  
于南軒者在此一敬亦吾徒所當共講也乃述舊所聞  
書而復之蓋人所以中天地而立者此一心也心所以  
主宰此身而裁制萬事者此一敬也操之而存存之以  
此敬也治之而治治之以此敬也養之而無害充而致

之以造乎至誠無息之地大率始終乎此敬夫敬豈自  
外至者哉人生而靜敬之原也是故君子之學貴乎主  
靜主靜者主乎一者也主一無適夫是以為敬中庸戒  
慎不覩恐懼不聞敬之在中而未發者也迨夫喜怒哀  
樂之既發則散見於外者何莫非此敬之流行出門如  
見大賓使民如承大祭皆戒慎恐懼之所積而慎獨之  
功也敬雖隨事而在所以為敬則本乎其中先生以敬  
加室亦欲人謹之於宮庭屋漏之間耳嗟夫世淪俗斁

子治之傳不遺其後而子敬獨能泝其父祖學問所從來恪守毋墜求之衰俗殆不多見余願子敬心迺祖之心學南軒之學以是自名其家以是私淑諸人益衍其傳於後使廣漢之派與武夷並傳顧不偉歟乃書為敬室記

李氏敬聚堂記

三代而上以宗法聯合族屬親親之恩雖百世不渝也宗法壞於秦義聚興於漢義聚者古宗法之遺意絕無

而僅見是故君子貴之善乎先正范公之言曰吾宗黨  
自始祖而下諸父昆弟猶子穉孫常數十百人自吾之  
身而言雖有戚疎遠近之不同然皆吾先祖一體之所  
分也夫以一體之所分而癢疴疾痛不相知聞貧富貴  
賤莫相收恤是豈吾祖先垂澤裕後之意哉乃立義莊  
聚族而居之至今二百餘年范氏裔孫猶列居文正坊  
中義規炳然海內視以為則余昔嘗寓跡於吳慕而效  
之宗黨散落四方集之不能會每以自慊晚歲來瀛邦



人父老為余言吾城中李氏鄉之義門也自其高祖脫身亂離拮据卒瘞始營居室遺命子孫聚廬合爨毋得他徙厥祖厥考率而行之迨至惠甫弟兄復從而推廣之聚指日蕃家政益治儉勤均節內外無間言蓋義居者五世矣余聞而善之一日造焉主人延客坐堂上弟子姪左右列侍撰杖奉几各以其職童子勝衣以上拜跪皆能如節余為之感嘆不能已噫嘻此中原舊俗毛公董子道化之所及於今不多見是當有褒表前此闕

焉今總管僕散公開鎮是邦崇尚風化大書張公藝事以示旌獎李氏榮之揭之西南特室求余扁其堂且為之記之將以傳示子孫期毋負賢牧表揚之意余於鄉黨美善固喜聞而樂道之李氏復以此為請其庸無書余惟公藝朴謹人也平居非有學問講習之益乃能恪承祖訓以一忍字聯合族屬是可尚矣然忍之為義見之經傳所以節止喜怒之過乎中者喜之過則流怒之過則厲家人嗃嗃怒之厲也婦子嘻嘻喜之流也節而

止之徐而正之夫是之謂忍非含蓄不發以是為忍也  
父父子子兄兄弟弟夫夫婦婦人之大倫所以行之者  
一敬而已矣長者敬身以率其下少者敬事而從其長  
和而肅順而則相與共由於禮教之內始於忍終於無  
所用其忍而家道成矣吾觀於李氏一門雍睦整飭相  
觀而善惠甫弟兄復能協贊其長招延師儒以暇日講  
說經義吉凶祭賓考於禮而後動是知敬矣傳曰敬德  
之聚也請名斯堂曰敬聚因書此以為記

直齋記

夫易天地自然之易也歷四聖成書至夫子而後集其大成一易之外無他易也漢末有揚子雲者著太玄始僭聖擬經而為之玄至衛之平又從而為之包其後率皆得一數成一書皆僭其號為易後人以其新奇而學之而天地自然之易隱矣是故易可學也而僭聖之書不必學矣學僭聖之書則四聖人之易愈不明矣此予平日之論也晚歲來瀛平生舊交皆遠惟閉戶讀易而

已既而趙君敬叔自燕而歸朝夕相從惟談周易不及  
其他予問之曰世人皆好擬聖之書予何為不談之敬  
叔曰吾惟知有易而已他未暇學也予聞其言斂衽欽  
嘆曰子可謂善學者矣僭聖人之書不接於目則聖人  
之易始著於心自是與敬叔論易一日敬叔語余曰吾  
以直名齋子為我發其義余曰直之字義見於經者多  
矣未知敬叔所以名齋之意何所本敬叔曰吾嘗讀易  
至坤之六二直方大不習无不利以為聖人之學實在

於此朝夕思之以為學問之大經吾之名齋取是而已  
余作而對曰善乎子之讀易也此余平日所得於易者  
而敬叔乃與余同夫直方而大乃聖賢傳心之要也本  
之吾心根諸天分此直此方也著之德行達之事為此  
直此方也自東而西自南而北以至上下內外左右前  
後何往非直何行非方惟直惟方是以為大斯乃天然  
一定之理與帝典執中中庸時中其義相須彼言中推  
之一家之中一國之中天下之中莫不皆然此言直言

方推一國一家以及天下之大亦莫不然此直方所以大也聖人之用易也以吾心本然之直自然之方而律天下萬事萬物之理推而致之何往而非直何行而非方此直方之所以為大也以其出乎至公本乎自然非智巧安排所可及是以云不習无不利非窮理之深有見於道者未易語之以此然敬叔以敬為字以直名齋合敬與直而其義乃備夫敬主乎一者也不貳以二不參以三乃所以為敬文言曰敬以直內義以方外敬義

立而德不孤此聖人教人以敬而求直所以直其內也  
由是而推之則義立而德方矣大學絜矩之道所惡於  
上毋以使下所惡於下毋以事上所惡於前毋以先後  
所惡於後無以從前所惡於左毋以交於右所惡於右  
毋以交於左大學所謂絜矩即坤六二敬以直內之所  
推也知夫子敬以直內之意即知大學絜矩之方所以  
合乎義也知大易之直方即知大學之絜矩主敬直內  
守義方外相須以成也知敬義相須即知直方所以為



大也吾與敬叔相處久而知其為人洞洞屬屬惟敬惟畏語不妄發發必中節行不妄動動必皆謹周游四方所與交游者皆當世名士確而信守而篤直能以敬而直其內者也由是而推之何行而不方乎惟直惟方所以必至於大真善易者也至於命著求卦必按乎義理而為之說不與時而俱遷故動中於禮不爽於義其平日用功專在持敬以行乎義吾觀其立心制行應事接物未有違乎敬者而其所得大率本之坤六二一爻非

善讀易不能也世之學者篤意於僭聖人書至於聖人之經往往忽焉予每病乎是故於敬叔所學深有取焉敬乎敬乎其直方之所以為大乎乃書以復之

節齋記

易於渙之後而受之以節節者所以正天下之渙而納之於至善之地也粵自天高地下萬物散殊盈乎宇宙之間者莫不皆有自然之節至衆而至一也至不齊而莫不皆止於齊也由其有自然之節而聖人因之以為

節故凡天下之渙者皆至於節而止日星運乎天渙也而有常度寒暑行乎地渙也而有常經在人則君臣父子之倫日用常行之道所以止仁止敬止孝止慈各止其止而不得過者皆其自然之節也士君子學問之道存養之功亦貴乎知所節知所止而已矣傅君夢臣中原望族世有爵邑於朝而夢臣以儒名家嗜學不倦中年奠居河間則以岐黃之道教授於其里扁所居曰節齋其用志固已過人遠矣余惟盤古三聖人為天地立

心既創制立法以冒天下之道復為生民立命而醫之  
教興焉其事雖不同而所以為節則無不同也子不觀  
乎渙與節之二象乎風行水上為渙風固動物而水與  
之俱風行而不留水逝而莫之止猶情感於物而動與  
物俱遷者也是故聖人受渙以節見水澤之義焉盈虛  
之不常者水也止節之有定者澤也義理之節情猶水  
之節乎澤止其所而不得過也是乃學問之道而醫之  
理存焉渙其受病之源節其制病之藥而甘節苦節云

者則參芝瞑眩隨所施各得其當者今吾與子目視而耳聽手持而足行所以固其肌膚之會筋骸之束者此節也而形命於氣氣為形役寒暑晦明蝕乎其外吉凶憂患感乎其前神放而馳氣暴而弗斂則疾疢之所從生也而醫經之節易經之節乃有相似者溫涼以劑其燥濕補瀉以制其盈虧窒者通之痺者砭之逸者收之疾之來無窮而吾之節無所不盡是固醫術而學問之道存焉若秦和陳六氣序五節以告晉平公且曰君不

節不時能無及乎夫所謂節惟其時也若醫和者其有  
得於用易之時者乎是故上醫明理引經以斷疾中醫  
明方引古以斷疾夢臣以節名齋庶幾上醫之明理者  
乎若夫以已之節而節人之未節以我之治而治彼之  
未治夢臣方將有用於世充而擴之其為節也又有在  
於醫之外者矣

拙齋記

昔者洙泗之上四科七十子聰睿明辨孰非當世之英

才而子曾子獨以天資一魯受知聖人其後造詣既深  
優入聖域獨承道統千載之緒傳之子思孟子流衍盛  
大至於無窮皆自前日一魯中來也余始至北方問中  
州道脈所託今有人乎縉紳諸公交誦魯齋許公之賢  
且曰篤實內守學為曾子者也余未及往見而自燕徙  
瀛許公亦告老而歸旋聞下世每用此為恨厥或告余  
曰繼許公而作者拙齋劉公仲寬其人也余時欲見之  
而劉公適以使事來瀛乃得相識聽其言論觀其風致

藹然道學氣象而用拙名齋與許公所以為魯心法實  
有相似者余喟然嘆曰繼魯翁而作者捨拙翁而誰歸  
乎道之源脈其在斯乎夫魯之與拙非容色之外見者  
也根諸天稟之自然加以學問之日益義精理明純一  
無雜故能以道自任譬之廣谷易川地力深厚種之無  
不生生之無不長大茂盛以其植本深厚故其發達悠  
遠彼淺中弱植條盈而疾萎者夫豈任重道遠器哉而  
況拙之字義與巧為對者也夫子嘗有云巧言令色鮮



矣仁又曰剛毅木訥近仁於一巧一拙之間有仁不仁  
公與私義與利之辨聖人之慮後世深矣有人於此簣  
其辭責其容飾乎其外以求人之悅已斯人也所為雖  
未至流蕩而忘返而志之所之常驚於外則人慾之分  
數視天理為勝去道之遠從可知矣復有人焉剛且毅  
不為苟容木且訥不事速售中有所主外無所慕斯人  
也縱未能全體皆仁而心之所存常務乎內則天理之  
分數視人慾為勝謂之近仁豈不信乎蓋天稟之厚者

為朴為純由是而加之以審問慎思益之以明辨篤行  
若繪事之後素其施功也有地其進德也有本何往而  
不為仁乎而人偽之滋者為巧為詐巧而亂德巧而足  
恭口給之禦便佞之友如張錦帆飾桂棹而涉滄溟萬  
里之險何行而可濟乎是故聖人示人以求仁之方常  
有取於確鈍而深戒乎巧令亟言之不一言之為是故  
也君早以才名自奮而務內踐實不為表暴俗尚文君  
則斂華而就質俗尚銜君則韜光而內守覃精義理之

書篤志性命之蘊其靜而正其純而直忱確內充德隅外著然猶以拙自命則君之謙也而亦君實行內充自得而自信者也君年踰耳順二親具慶而旨甘之奉溫清之節早暮必躬猶懽然自以為未足扁其堂曰取足此又君實行之著於家庭者也孟子論曾子之養志而曰事親若曾子可也可之為言僅可而不自以為足此曾子所以大過人者拙齋務內踐實亦學為曾子者也曾子之學仁也曾子之孝曾子所以成其仁也學問之

道由明善而誠身悅親以至信乎友獲乎上得乎民體  
用兼該有諸中必達於外窮而在下則任斯道之託達  
而居上則任世道之託莫不自務內踐實中來吾於拙  
齋有望焉書此為記以見余區區期望之意云

尊教堂記

陸象山先生近世大儒也嘗有云東方有聖人生焉此  
心同也此理同也西方有聖人生焉此心同也此理同  
也數千百載之上有聖人生焉此心同也此理同也數

千百載之下有聖人生焉此心同也此理同也語出人  
或謂象山兼取二氏之學余曰不然此心此理四方上  
下實無不同豈惟聖人同之智愚賢不肖得諸天而有  
諸已莫不皆同但聖人先得我心之所同然者耳是故  
聖人因心以明道因道以立教道在天地間一而已矣  
教在天地間亦一而已矣自羲農黃帝迄于唐虞商周  
之盛此一道也此一教也由中邦達于四外極于八表  
日月所照霜露所墜此一道也此一教也聞域中有四

大者矣而未聞教之有三也至西漢初年有為黃老之言者暨晉宋齊梁魏隋而西竺之教行乎中國雖並驅相先各尚其所尚然其即心以明道因道以立教謂人性無有不善人皆可以學至于聖賢與吾聖人所以立教有相似者象山翁所謂此心之同此理之同以是故爾余昔在里中鄉人有立祠象設吾聖人與老子瞿曇而參事之者榜之曰三教聖人之祠余語之曰教可三乎教可三道亦可三乎盍扁之曰尊教庶幾合異為同

則其三者可會而歸于一也衆皆曰然晚歲至瀛聞任丘范君字某所居當南北大道儒先生與黃冠緇侶過其門者莫不延入禮遇盡敬余聞而異之已而求見其道所以然之故曰吾于三聖人之道敬之如一故于三聖人之經與三聖人之徒禮遇致敬亦惟一吾嘗治堂奉九經居中左佛書右老子道德經諸子百氏列之兩傍客有知道者延入于斯就而訪之以道冀有得焉余聞君言重用嘉歎嗟夫如君者志于求道是以庸敬在

道視世俗之人尊崇異教以徼求福利者不可同日語矣乃書尊教二字以扁其堂復為之記

思義齋記

思義齋者鯨川李氏所以垂訓於其子孫也李氏祖子孫三世相承無他兄弟至思義君乃有三子皆業儒通經行誼著于其里思義君每為之戒曰吾孤根獨傳於今三世每懼弗克負荷汝兄弟壯大鼎立自今子孫繩繩足以勝祖先門戶之託然吾欲爾曹之聚而相依不



欲爾曹之析而相遠也夫人所以族居林立於宇宙之內孝友睦婣交相愛者以有義存焉耳義者天理之自然人心之固有義存則由祖暨孫至于永世一本而衆支也譬之松栢生乎高岡枝葉扶疎上干霄漢自本自根一而已矣是以昔之鉅賢偉人聚族而處名曰義聚為之田曰義庄為之居曰義宅比屋而處共爨而食揭為義規祭祀婚嫁慶弔吉凶交相收恤百世如一日也吾以思義名齋欲汝曹之思乎義而常相保也其嗣長

卿率其仲李恪遵遺訓扁思義于中堂介友人求余為之記之余聞其言敬其意而不敢拒也昔者洙泗之上格言昭垂而有九思之目始之以視聽貌言之思終之以見得思義思至于九聖門所以垂訓者備矣李氏所以名齋其義有所在然思而必在義其于義利之辯可謂知所決擇矣夫見得思義非事至而後為之思也蓋心者一身之主宰而思則心之精神所以酬酢事物而使之各中其度而不忒者也聖賢學問之功惟思為謹

操而常存此思也定而能應此思也惟其用功篤志思之在我者一而不二純而不雜先有以主宰乎其內故事至物來各就吾之條理而無爽於義本之正而末之隨也天理在是外物紛至無由而入故思不在于得而在乎義是其謹思之功也他日子路論成人而曰見利思義子張論士之為士而曰見得思義夫以子路之堅強子張之明辯而其用功特在乎此則知九思之目以思義為終聖門高弟猶或難之學者可不致謹于是乎

鯨浦居川陸之會帆檣夜馳輪蹄晝奔莫不逐逐於榮利之徒窮者思通蟄者思奮未得者期于得而長卿兄弟端靖自守澹然無營恪遵先訓以垂裕于後其胄次所存可以想見推其思義之功何行而非義乎故吾樂以孔門垂訓與子路子張所以決擇於義利之辯而為君告尚勉之哉

時思堂記

曲沃許氏中州望族也孝弟之行著於鄉閭由祖仲玉

翁至其孫君祥三世同一心法前輩名人嘗為扁其堂  
曰時思搢紳大夫士為之記為之贊為之銘及詩篇成  
一巨軸亦以示余俾繼題其後余惟時思之義美矣況  
祖傳之子子傳之孫百年相承如一日是蓋人之所難  
其可不為之書乎然念人子之事親有終身之養有殁  
身之思文王之事王季曾子之養曾皙行之有常守之  
不懈此聖賢所以盡道而垂法于後世者也武王率文  
王之已行不敢少替而曾元之事曾子乃不其然是知

祖子孫三世一心以事親為事之本在古猶難況於今  
乎故余謂能盡終身之養者乃能致歿身之思許氏祖  
暨孫所以奉養其親者見於諸賢之記銘詩頌稱贊無  
異辭則其孝敬之實有以大信服於人矣而又能推其  
平日奉養之心而為歿身追遠之心即晨昏定省之勤  
而致其春秋烝嘗之思禮與哀俱至而無遺憾斯豈非  
人之所甚難乎愚讀禮內則篇見聖人教人以養親之  
事子事父母雞鳴而起各服其服各事其事躬掃灑問

起居職醴醢治滫瀡一日之內斯須之頃思存乎事事  
無所不在所謂終身之養也又嘗讀祭義篇而見聖人  
教人以歿身之思霜露既降則有悽愴之心雨露既濡  
則有怵惕之心至其祭也思其笑語思其志意思其所  
樂思其所嗜思之所存即孝敬之所存是之謂歿身之  
思必能盡終身之養而後能致其歿身之思將之以禮  
敬行之以哀慕如親之在此堂所以致歿身之思也余  
願君祥書內則於居處之室書祭義於饗祀之堂使世

世子孫當養而升斯堂覩內則之教而思所以養當祭而升斯堂覩祭義之教而思所以祭則孝敬之心油然而生子暨孫至於曾玄傳心法於無窮矣若乃顯親揚名之事不在乎他在於貴已之貴而已修其人爵以道自貴已貴而親亦顯是謂孝子慈孫之能事君祥其勉之哉

節孝堂記

歐陽文忠公作五代史有取於王凝妻李氏守節事所



以扶世道於既墜愧當時之為臣者也五季馮道歷相  
四朝身事七姓偷生苟全至其將終猶著長樂老叙自  
矜為榮孟子所謂無羞惡之心非人者其道之謂歟是  
故君子之東史筆者於守節之婦為之立傳記姓名俾  
其志節有傳於後人苟知王凝妻之為賢則於馮道之  
偷生苟全唾棄而不顧矣道晚歲得封於瀛邦猶有指  
其生平游歷之處相與言曰是瀛王舊遊之地余每懼  
其污染後人壞亂風俗屢因碑碣間懇懇見意欲人之

知慕乎古毋羨乎馮蓋為世道慮與歐公五代史為節婦立傳同意非徒言也國子安為余言吾里於瀛南之交河習俗篤厚好禮義夫節婦比世間見無慕於馮也里中有張得山之母楊氏早喪夫父母欲奪而嫁之誓志弗聽家貧子幼舅姑垂白在堂楊氏躬井臼之勞治耕織之事旨甘不廢溫清如節厥後舅姑歿竭力喪祭皆能稱禮斯烈丈夫所難而楊氏乃能行之由少暨老四五十年子壯而後其憂乃釋族黨父兄共高其行名

其所居堂曰節孝謂其守節而能孝求余為之記之余  
羈客也辭不敢當居數月子安再從邑里來致鄉黨之  
請益勤余又念瀛為馮道封食之壤其一時貴盛疑足  
以移人而是邦是邑婦之義子之孝臣之忠比世而間  
見是因人心秉彝之常不待教之率之而自趨於善者  
而亦可見漢獻王毛公董子詩書道化所及至於今而  
未艾也是其可無書乃題此下方以待作史者採焉

積慶堂記

坤之文言曰積善之家必有余慶先儒為之說曰善以積言父祖修之身存之心者是也慶以餘言父祖積諸此身此心所遺子孫者也積之者源也積而成慶自源祖流非由外至者也其積者深且厚則其成流大以遠如長江巨河發源乎岷峨積石會百川衆流東注滄海其流無盡由其源之來無窮也是故仁人孝子深思父祖積累之艱勤而有上棟下宇以為安則曰吾祖吾父之所營構也食而有左饕右粥以為養則曰吾祖吾父

之所菑畲也以至仕而祿食有身章之榮車馬之奉則又慨嘆而永懷曰吾祖吾父積仁累善乃弗得食其報其報乃在我吾何修而有此乎歲孟春率宗族拜省世墓徘徊顧瞻而不能去尊者老者貴者視其幼者孤者貧不能自存者惻然興嘆曰爾曹皆吾皇始祖一氣之所分也皇祖積慶以逮後嗣吾獨享其成而不能分其惠以及宗黨吾所內愧而不遑安也繼自今仕而有祿食者居而有餘財者各分其有餘以逮其不足喪未舉

者衆共舉之男未室女未家者衆協力以成之老而無  
以為養病而無以為藥則為居廬以收恤之俾吾祖之  
德澤均逮後人夫然後有以見松楸而無餘憾矣衆皆  
曰善遂為約以倡之凡族大而子孫衆多者推一人為  
約主期以十年買田為庄名之曰義庄漸而益之庄成  
則鰥寡孤獨廢疾者皆有以為養無散而之四方淪而  
事他業者矣倡斯義者先正范公天下第一流人也規  
約至今具存海內視以為則古瀛王君成之聚族交河

百有餘年中更喪亂屋廬毀焉惟成之先隱君所居巋然獨存其地近於祖墓自成之晉登撫仕每歸必會族省掃退而序拜斯堂思與父祖弟姪共大厦之覆以推廣前人遺後之澤且將創立義庄如范氏之約屬余為之記之余惟世淪俗數人有同室藩牆共居越秦憂患吉凶不相收恤者而成之拳拳葛藟之情以睦族為急先務求之當世能幾人哉余用是不敢辭然願有以補義規之所未及夫祖先所以裕及其後者詩書之業義

規既成幸皆可以為養然不可以無教也延致里中宿儒聚宗族子弟之有志於學者俾之教之各通一經各為一藝無適他途無營他業也席珍待聘懷忠信以待舉可也他年我冠垂紳於朝廷之上以行其所學夫然後有光祖宗而究顯揚之美流積慶於無窮矣

種德堂記

曰人有問余者曰積善降祥有德必得其壽信乎否耶曰自六經聖賢以來有是言矣奚其不信蓋通天地間



惟理與氣而已仁義忠信理之存乎人者也壽考福澤  
氣之應乎理者也理行而氣從有必至之應然必為之  
力行之勇要其久而後信子不觀之農圃之事乎稻粱  
菽蔬所以種之必生生之必遂者物理之常也然有耕  
並壤而登耗之弗齊種同時而美惡之或異者氣有厚  
薄使之然耳理其常也氣不可常者也理足以主宰是  
氣氣惟理之從其不常者皆可常也是故上農老圃之  
事其事也惟其理不惟其氣時而耕之時而布之時而

灌之溉之耘之耔之去其稂莠之害苗者夫然後生意  
流行無所不及理在是則氣斯應之矣人之有是心猶  
物之有其實操存涵養之功則栽培種藝之事也操之  
而存養之而不害理之充於我者無不盡則氣之應乎  
理者無不周故作善降祥有德得壽有莫知其然而然  
者書曰臯陶邁種德德而言種言邁為之力行之勇要  
其久而後信云耳余寓河間之中城與李君吉甫為隣  
每造其室見其家庭肅雍長幼順承子孫環侍終日無

情容以是敬之退而詢諸鄉黨則知吉甫筮仕四方所至以善狀著聞去而見思其強於為善有自來矣吉甫筮堂既成扁之曰種德中子志遠與余遊從最久求余為發其意前既引稼為喻而意有未能盡者復於此而畢其說蓋士生斯世莫不求為有用種學所以種德也種之身以及於家以及於國是其種工非一朝夕所能致也在易地中生木為升山上有木為漸聖人於升之象而曰君子以順德積小以高大於漸之象而曰君子

以居賢德善俗蓋地中之木由根幹而枝葉寸寸而生  
以及於丈尋夫然後適於用學者進德之序也山上之  
木挺特卓立與山體俱高足以風厲於下君子有位之  
事也積小高大成已也居德善俗成物也皆積而後升  
漸而後至吾所謂為之力行之勇要其久而後信者也  
吉甫老成更練諸子森然階庭或以學問自力或以才  
能奮身他日成就可棟可楹可榱遠到未可量也  
乃書以勉之

瑞雲寺記

區宇中分而釋氏宗教亦判為南北各師其師各道其道杳鑿氷炭不相為謀百有餘年矣豈期車書混同萬里一轍釋氏宗教因是亦合於一淮浙荆楚有志於訪道者絡繹而北燕趙齊魏有志於求師者亦振臂而南南北一家佛道祖教由此而中興噫亦盛矣虎巖大長老奮身淮甸踏遍諸方晚歲簡知九重擢主靈隱方丈以當世第一流主東南第一刹南北學徒充溢錫下動

以千數前是百餘年未之有也虎巖不以地位高峻接  
引忘倦每示衆曰吾老矣汝諸人有疑速問莫待吾影  
落空山持鐵鋤而問靈骨乃即錢塘之瑞岡介竺峯靈  
鷲之間度地數頃據山水要會剏一招提示為退居之  
計欲學徒篤志求道惟日孜孜非自成已所以成物也  
中為大殿外為山門左有僧堂右有香積環以精舍游  
被恩命以瑞雲院開山俾其徒甲乙主掌密近靈隱而  
自為門戶各無相關內外圓成遣一禪人求予作記曰

是吾退居也是吾菟裘也公為我發其意予告之曰進必有退亦物理之常師之道價方隆遽求高退不太早計乎予聞近代尊宿矯世俗興作之弊卜退居於揚子江心者又有卜退居於海門潮上自以為高者予嘗語之曰奇則奇矣而未高也夫居其所當居樂其所可樂何山不可以藏骨至與魚龍爭其洞穴以為退不亦隘乎虎巖之下瑞雲不幽而深不藏而密樂哉斯丘異乎他人之退居矣吾聖人云居天下之廣居立天下之正

位行天下之大道道之所在即居之所在進一廣居也  
退一廣居也三千大千世界何往而不可居何山而不  
可退乎百尺竿頭更宜進步虎巖勉之

寂照閣記

真谷居士陳君彥祥早歲周遊中原徧交當世名卿巨  
儒以至外方博達之士無不就而訪之以道充然若有  
得也乃歸築室高陽之下父子自為師友名其讀書閣  
曰寂照予過之問焉曰子為吾聖人學乎亦有取於釋



氏語乎聖人言寂釋氏亦言寂義近而理殊不可以莫之辨也居士請予發其意為之言曰夫心一太極也沖漠無朕者太極之本體也寂然不動者此心之本體也方其沖漠無朕一理混然而動靜互根所以生兩儀四象八卦者舉在是矣方其無思無為寂然不動而道德性命之理所以離為仁義別為五常散為百行萬善者舉在是矣是故未發而寂心體之本然也已發而通心體之妙用也無思非無所思也無為非無所為也其寂

然不動之本體固如是也及夫感而遂通天高地下萬物散殊孰有出於思慮之外者是之謂以一理而貫萬殊義之畫文之豕孔之繫如斯而已矣佛氏則不然其所謂寂即空以為寂心無心也形無形也物無物也是為體而不能該乎天下事物之理非體也至其動而接乎物境空境也相空相也法空法也以是為用而不能周乎天下事物之理非用也何則寂非空也彼視其身與天地萬物等一虛空露電以原其始而莫知所始

夢幻以要其終而莫適所終是之謂以一空而了萬法  
體之不能該用之豈能通乎故吾儒異端言寂雖同而  
所以為寂則異不辨則不明也或曰若子所言寂之為  
感與寂之為照有以異乎曰自此心之本體而言寂而  
感者心體之妙用也自學問積功而言寂而照者亦心  
體之妙用也子不觀之日乎夕而向晦日之寂也朝而  
升乎天衢無容光之不照者向晦之所息也子不觀之  
歲乎冬而閉藏者氣之寂也春而陽明發舒萬生被其

光榮者閉藏之所為也人之此心虛靈瑩徹萬善畢備  
然非主靜以正其本謹獨以澄其源存誠於幾微毫忽  
之間積功於不睹不聞之地何以復此心本體之渾全  
輝光日新明明德而靡不周乎故寂照云者學問存養  
之功積久而後見非即空以為寂即寂以為明也居士  
覃懷人嘗佐大名幕倦遊而歸繪松林秋月為圖著深  
衣持麈拂据磐石而坐若思非思其有志於自治其心  
者乎其嗣子新篤學好修強毅有守他日必將有用於

世其所涵負殆未可以淺窺也余以羈客來瀛獲交君  
父子朝夕所講皆義理之大端故登斯閣喜而為之書

洞霄宮記

道為三極之祖大包宇宙而不見其外細入毫粟而不  
見其内生陽生陰神鬼神帝陶鎔千聖橐籥萬象不見  
其蹟是故莫大乎天地此道撐拄乎天地莫幽乎山川  
此道充塞乎山川道即理理即太極太極本無極撐拄  
乎其上無一瞬之或息故曰天柱充塞乎其中無一隙

之不周故曰洞天嗚呼為天柱洞天之說者其知道乎其至人示以至道之精衆妙之門乎夫天有形道無體以無攝有誰為之耶天至大洞至小以小納大誰司之耶天柱即大易統天承天之象老氏天地得一清寧之旨洞天即大易天在山中之象老氏谷得一以盈之意無疑矣夷攷往牒女媧氏斷鼇足以立四極非鼇也道也天柱之喻也元始坐浮黎寶珠十方天神悉入其間何神也道也洞天之喻也餘杭大滌山洞霄宮為三十

六洞天之一與舒州壽陽天柱為三金堂玉室上通太微奇異神秀不可殫紀漢武立館候神歷晉暨唐以至宋世累朝禮奉深謹代生高人主張斯道咸淳甲戌臘月不戒於火千礎皆灰會世運更革歸化聖朝山中諸老合力營之既底于成為力勤矣至元甲申六月鬱攸洊作一夕復盡四衆還視於邑太息提點官事一山郎公如山提舉宮事桂林舒公元一敏毅介特人也不沮不懼宣言於衆曰吾將新之取木他山運粟他所叶心

集思鳩工度材先建庖帑乃築大殿以及餘屋元貞乙未之三月壬子告成金碧瑰麗照映林谷神運鬼工殆不是過朝家欽崇護持視昔有加既成囑余為記余辭不可已而告之曰洞有天天有柱吾言於前矣天中有天盡終言之夫天中之天上極無上是為三境境雖三清則一也又三其為九名雖九清則一也學道之人鍊陽消陰朝夕存存以我之清同造物之清清乎清乎超萬形而不壞者乎遂筆之記



序

孝先詩卷序

人之為善廼已分之所當為非有為而為之也如種之必生炊之必熟種者炊者但知其用力之勤而已為之不怠則種者必能生炊者必能熟皆自然之理也于公自謂我治獄多陰德子孫必有興者令高大門閭以需之於異日其言果驗然以已之陰德責報於造物學道君子所不言也余久羈古瀛地與鯨川相接知張氏為

孝弟之門由祖而子而孫傳以孝弟至於孝先不懈  
愈勤鄉黨稱之士大夫敬之余雖未識其人知之久矣  
一日見此軸以于公陰德為言余語之曰子之德修之  
於身行之於家由祖至孫傳之如一日世所為實行不  
期報於造物而造物之報常在焉所謂孝弟之道通於  
神明者也而豈世俗陰德陽報者云乎哉中庸曰大德  
必得其位必得其祿必得其壽此雖為大舜而言然人  
之有一行之修一事之善莫不能不格而孚不感而應

自然而然者也栽者培之豈不信哉子力行不倦其效有不可得而言者願言勉之

送崔壽之序

余讀詩至鄭風子衿掩卷而嘆曰周之東遷未久學校之廢乃至是乎及觀魯頌之泮水其詩曰魯侯戾止小大從公又曰載色載笑匪怒伊教上以是率其民下以是從其上八章藹然與鄭風我往而彼不來者異矣蓋周公魯公之化在人未泯故其習俗漸漬有以異乎他

邦也河間古文物郡毛公董子之化至今猶有存者士  
尊名教而貴禮讓遠功利而談詩書出而仕於四方所  
至皆以興學校崇教化為事然有行之而通者焉亦有  
率之而不能應感之而未能盡孚者焉是則魯鄭比壤  
而學之興廢不同其俗使然非士君子所病也崔君壽  
之河間之秀弱冠從其鄉曲老先生講問經義敏而好  
修有黨里之譽往歲調官安陽始至即延師儒設講席  
率郡之子弟執經請疑人肅然知有師道學宮久廢墟

為牧場前之仕乎此者莫或過而問之君獨以是為戚  
亟佐其長鳩工度費興頽舉壞闢宮牆拓厦屋像先聖  
賢而事之春秋歲祀俎豆具設登降如禮長老預在列  
者咨嗟太息不圖盛事復見於今政將成翩彼飛鶚乃  
或鳴其不善亟委而去之士論共惜壽之則不以是芥  
蒂杜門講習忘倦久之乃調廣平之賓幕春仲將發眾  
為祖於郭南或舉觴而言曰魯僖之化不可以行於鄭  
校泮林詠歌不可以加於城闕子是行欲興學其毋遽

乎余曰不然士之仕也觀其志之所存及其既仕也觀其政之所先其所先者乃其志之所存也存之於平居先之於臨事惟學問君子能之不可望此於衆人也壽之筮仕之始涖官之初即能以延儒興學為急先務由其志之所存也在是故其政之所先者亦在是此正壽之所以卓然過人出處通塞係乎所遭其可以是沮吾志乎況廣平地大物衆秀民彙興皆有志於道夫豈安陽可儼余願君舉安陽之已行而行之廣平推安陽之

未及行而究之廣平必致其長於魯僖鄭僑漢文翁之上使人曰路幕有儒者故路之政事皆出於經美聲洋溢主賓俱榮不亦善乎若夫治簿書課功程苟逃曠責刀筆吏類能之不足為君浼也乃書此以餞之

送楊善長序

三代盛時耕於野者為民升於學者為士士者民之秀傑千百而一二者也故有選士有俊士有造士由俊而造德成行尊是之謂進士王與二三大臣論其材能而

授之以位公卿大夫由此其選也乃若府史胥徒之屬  
則庶人之在官者耳蠲其征輸而役之以事官長所舉  
不以薦之于王是烏得俊造齒哉蓋上之所貴者在士  
故天下之士莫不知所以自貴風俗淳厚人才衆多用  
此道也降春秋而戰國王者之制日以隳壞而老學宿  
儒猶能以道自任不與世變俱遷也當時諸侯大國之  
君亦知儒之為貴卑躬盡禮惟恐不能致其肯以待衆  
民異術者而待之乎又降而兩漢選舉之制雖與古異



然非經明行修名為儒者不得在高位國之羽儀民之師表於是乎在其有由他途而進或階曹掾而升不過職錢穀治簿書試以其所長而止耳自是以來千有餘年九流名家並馳爭先而聖人之道儒者之教如三辰麗天清明光潔萬目同仰夫豈以一屈一伸或用或捨而為晦明軒輊乎道如是教如是儒者之所以為貴亦如是萬鈞一羽在我而不在物也河間楊善長家世業儒中間為菽水之養試掾于京俄而風木纏悲以是返

舍既除喪自念祿不逮養乃捨去刀筆之陋復儒冠焉  
鄉黨以是賢之一日過余具道所以然之故求一言以  
表其向道之夙忱余語之曰人有下喬而入幽者矣子  
今捨掾從儒所謂出幽而遷喬子之立志善矣雖然立  
志非難而堅志為難余願子持之以靜深要之以悠久  
毋動於榮利毋奪於貧苦毋安於卑近歲通一經以植  
其大本聞海內有先覺之士必往請質所疑以定學問  
之指歸使在我者充然實有可恃萬鍾軒冕且不足以

累其方寸庶人在官之祿又何足為浼乎

送穆秀之序

周子太極圖義理之宗也邵子先天圖象數之源也二子發前聖未發之蘊海宇所共宗仰人無異辭也而朱漢上易表乃謂穆君伯長得二圖于華山陳希夷氏以太極圖授周子以先天圖授李之才之才傳之邵子則二圖乃伯長所傳于華山翁者漢上之語其徵信乎近世大儒乃謂太極圖周子自得之學似不以漢上之語

為然蓋推尊周邵不欲汨之于異教而伯長付授之功  
其可沒乎嗟夫長江大河行地萬里以趨於滄海而岷  
嶓積石乃其發源所自江河之大初不以發源為諱也  
蓋伯長傳之周邵二先生推而衍之伯長傳其圖二子  
得其圖外之心由是成通書成皇極經世流行盛大以  
至於今如長江大河汪洋浩博東注於海而伯長之傳  
則岷嶓積石之發源有不容廢也穆氏裔孫少見于南  
方余羈寓古瀛乃得與秀之相識伯長先生之裔孫也

捧憲檄巡行屬郡潔廉自將端靖無擾民譽交歸公退之餘坐驛手不釋卷或遇儒生質疑辨惑亶亶不倦其學厥有自來信乎其為伯長之裔孫矣將還求余贈行語余謂秀之子之職業優矣子之才具美矣子之仕進有梯矣余所望于子者修明爾祖之學以顯爾祖之道且以淑爾身使天下之人知太極先天二圖之所自來非吾子之當務乎蓋周子通書邵子經世書觀物等書皆圖外之心而近代晦庵朱子著太極解義及易啟蒙

等書又所以推明周邵二子之學其書浩博不可涯子  
勉讀之道在是矣

